



崔顥集卷上

五言古詩

贈王威古

三十羽林將出身常事邊春風吹淺草獵騎何翩翩
插羽兩相顧鳴弓新上弦射麋入深谷飲馬投荒泉
馬上共傾酒野中聊割鮮相看未及飲雜虜寇幽燕
烽火去不息胡山高際天長驅救東北轉戰解城全
報國行赴難古來皆共然

古遊俠呈中軍諸將

少年負膽氣好勇復知機仗劍出門去孤城逢合

圍殺人遼水上走馬漁陽歸錯落金鎖甲蒙茸貂
鼠衣還家行且獵弓矢速如飛地迥鷹犬疾草深
狐兔肥腰間帶兩綬轉眄生光輝顧謂今日戰何
如隨建威

贈輕車

悠悠遠行歸經春涉長道幽冀桑始青洛陽蠶欲
老憶昨戎馬地別時心草草烽火從此來邊城閉
常早平生少相遇未得展懷抱今日杯酒間見君
交情好

關西作

燕郊芳歲晚殘雪凍邊城四月青草合遼陽春水
生胡人正牧馬漢將日徵兵露重寶刀濕沙虛金
鼓鳴寒衣着已盡春服與誰成寄語洛陽使爲傳
邊塞情

贈懷一上人

法師東南秀世實豪家子削髮十二年誦經峨眉
裏自此照群蒙卓然爲道雄觀生盡入妄悟有皆
成空淨體無衆染苦心歸妙宗一朝勅書至召入
承明宮說法金殿裏焚香清禁中傳燈遍都邑杖
錫遊王公天子揖妙道群僚趨下風我法本無着

時來出林壑因心得化成隨病皆與藥上啓黃屋
心下除蒼生縛一從入君門說法無朝昏帝作轉
輪王師爲持戒尊軒風灑甘露佛雨生慈根但有
滅度理而生開濟恩復聞江海曲好殺成風俗帝
曰我上人爲除膾腥欲是日發西秦東南至蘄春
風將衡桂接地與吳楚隣舊少清信士寔多漁獵
人一聞吾師至捨網江湖濱作禮懺前惡潔誠期
後因因成日旣久事濟身不守更出淮楚間復來
荆河口荆河馬卿岑茲地近道林入講鳥常狎坐
禪獸不侵都非緣未盡曾是教所任故我一來事

永承微妙音竹房見衣鉢松宇清身心早梅業至
淺晚成計可尋善哉遠公義清淨如黃金

結定襄郡獄

我在河東時使往定襄里定襄諸小兒諍訟紛城
市長老莫敢言太守不能理謗書盈几案文墨相
填委牽引肆中翁追呼田家子我來折此獄五聽
辨疑似小大必以情未嘗施鞭箠是時三月暮遍
野農桑起里巷鳴春鳩田園引流水此鄉多雜俗
戎夏殊音旨顧問邊塞人勞情曷云已

雜詩

可憐青銅鏡掛在白玉堂玉堂有美人嬌弄明月
光羅袖拂金鵲綵屏點紅粧粧罷含情坐春風桃
李香

遊天竺寺

晨登天竺山山殿朝陽曉澗泉爭噴薄江岫相縈
繞直上孤頂高平看衆峰小南州十二月地暖冰
雪少青翠滿寒山藤蘿覆冬沼花龕瀑布側青壁
石林杪鳴鐘集人天施飯聚猿鳥洗意歸清淨澄
心悟空了始知世上人萬物一何擾

入若耶溪

輕舟去何疾已到雲林境起生魚鳥間動搖山水
影巖中響自荅溪裏言彌靜事事令人幽停橈向
餘景

七言古詩

川上女

川上女晚粧鮮日落青渚試輕楫汀長花滿正迴
船暮來浪起風轉緊自言此去橫塘近綠江無伴
夜獨行獨行心緒愁無盡

代閨人答輕薄少年

妾家近隔鳳凰池粉壁紗牕楊柳垂本期漢代金

吾壻誤嫁長安游俠兒兒家夫壻多輕薄借客探
九重然諾平明挾彈入新豐日晚揮鞭出長樂青
絲白馬冶遊園能使行人駐馬看自矜陌上繁華
盛不念閨中花鳥闌花間陌上春將晚走馬鬪鷄
猶未返三時出望無消息一去那知行近遠桃李
花開覆井欄朱樓落日捲簾看愁來欲奏相思曲
抱得秦箏不忍彈

長安道

長安甲第高入雲誰家居住霍將軍日晚朝迴擁
賓從路傍拜揖何紛紛莫言炙手手可熱須臾火
盡灰亦滅莫言貧賤即可欺人生富貴自有時一
朝天子賜顏色世事悠悠應始知

渭城少年行

洛陽三月梨花飛秦地行人春憶歸揚鞭走馬城
南陌朝逢驛使秦川客驛使前日發章臺傳道長
安春早來棠梨宮中燕初至葡萄館裏花正開念
此使人歸更早三月便達長安道長安道上春可
憐搖風蕩日曲江邊萬戶樓臺臨渭水五陵花柳
滿秦川

秦川寒食盛繁華遊子春來不見家鬪鷄下社塵

初合走馬章臺日半斜章臺帝城稱貴里青樓日
晚歌鐘起貴里豪家白馬驕五陵年少不相饒雙
雙挾彈來金市兩兩鳴鞭上渭橋渭城壚頭酒新
熟金鞍白馬誰家宿可憐錦瑟箏琵琶臺新酒就
君家小婦來不解羞嬌歌一曲楊柳花

行路難

君不見建章宮中金明枝萬萬長條拂地垂二月
三月花如霰九重幽深君不見豔彩朝含四寶宮
香風吹入朝雲殿漢家宮女春未闌愛此芳香朝
暮看來看去看心不忘攀折將安鏡臺上雙雙素
手剪不成兩兩紅粧笑相向建章昨夜起春風一
花飛落長信宮長信麗人見花泣憶此珍樹何嗟
及我昔初在昭陽時朝攀暮折登玉墀只言歲歲
長相對不寤今朝遙相思

鴈門胡人歌

高山代郡東接燕鴈門胡人家近邊解放胡鷹逐
塞鳥能將代馬獵秋田山頭野火寒多燒霧裏孤
峯濕作煙聞道遼西無鬪戰時時醉向酒家眠

七夕

長安城中月如練家家此夜持針線仙裙玉珮空

自知天上人間不相見長信深陰夜轉幽瑤階金
閣數螢流班姬此夕愁無限河漢三更看斗牛

江畔老人愁

江南年少十八九乘舟欲渡青溪口青溪口邊一
老翁鬢眉皓白已衰朽自言家代仕梁陳垂朱拖
紫三十人兩朝出將復入相五世疊鼓乘朱輪父
兄三葉皆尚主子女四代爲妃嬪南山賜田接御
苑北宮甲第連紫宸直言榮華未休歇不覺山崩
海將竭兵戈亂入建康城煙火連燒未央闕衣冠
士子陷鋒刃良將名臣盡埋沒山川改易失市朝

衢路縱橫填白骨老人此時尚少年脫身走得接
海邊罷兵歲餘未敢出去鄉三載方來旋蓬蒿忘
却五城宅草木不識青溪田雖然得歸到鄉土零
丁貧賤長辛苦採樵屢入歷陽山川稻常過新林
浦少年欲知老人歲豈知今年一百五君今少壯
我已衰我昔少年君不睹人生貴賤各有時莫見
羸老相輕欺感君相問爲君說說罷不覺令人悲

盧姬篇

盧姬小小魏王家綠鬢紅唇桃李花魏王綺樓十
二重水精簾箔繡芙蓉白玉欄千金作柱樓上朝

朝學歌舞前堂後堂羅袖人南窓北牖花發春翠
幌珠簾鬪絲管一彈一奏雲欲斷君王日晚下朝
歸鳴環佩玉生光輝人生今日得嬌貴誰道盧姬
身細微

孟門行

黃雀銜黃花翩翩傍簷隙本擬報君恩如何反彈
射金罍美酒滿座春平原愛才多衆賓滿堂盡是
忠義士何意得有讒諛人諛言翻覆那可道能令
君心不自保北園新栽桃李枝根株未固何轉移
成陰結實君自取若問傍人那得知

邯鄲宮人怨

邯鄲陌上三月春暮行逢見一婦人自言鄉里本
燕趙少小隨家西入秦母兄憐愛無儔侶五歲名
爲阿嬌女七歲丰茸好顏色八歲黠惠能言語十
三兄弟教詩書十五青樓學歌舞我家青樓臨道
傍紗牕綺幔暗聞香日暮生歌駐君馬春日粧梳
妾斷腸不用城南使君壻本求三十侍中郎何知
漢帝好容色玉輦携登歸建章建章宮殿不知數
萬戶千門深且長百堵塗楹接青瑣九華閣道連
洞房水精簾箔雲母扇琉璃窓牖玳瑁牀歲歲年

年奉權宴嬌貴榮華誰不羨恩情莫比陳皇后寵
愛全勝趙飛燕瑤房侍寢世莫知金屋更衣人不
見誰言一朝復一日君王棄世市朝變宮車出苑
茂陵田賤妾獨留長信殿一朝太子升至尊宮中
人事如掌翻同時侍女見讒毀後來新人莫敢言
兄弟印綬皆被奪昔年賞賜不復存一旦放歸舊
鄉里乘車垂淚還入門父母愍我曾富貴嫁與西
舍金王孫念此翻覆復何道百年盛衰誰能保憶
昨尚如春日花悲今已作秋時草少年去去莫停
鞭人生萬事由上天非我今日獨如此古今歇薄

皆共然

崔顥集卷上

崔顥集卷下

五言律詩

晚入汴水

昨晚南行楚今朝北汴河客愁能幾日鄉路漸無
多晴景搖津樹春風起棹歌長淮亦已盡寧復畏
潮波

發錦沙村

北上途未半南行歲已闌孤舟下建德江水入新
安海近山常雨溪深地早寒行行泊不可須及子
陵灘

題潼關樓

客行逢雨霽，歇馬上津樓。
山勢雄三輔，關門扼九州。
川從陝路去，河遶華陰流。
向晚登臨處，風煙萬里愁。

題沈隱侯八詠樓

梁日東陽守，爲樓望越中。
綠窓明月在，青史古人空。
江靜聞山狃，川長數塞鴻。
登臨白雲晚，流恨此遺風。

送單于裴都護赴西河

征馬去翩翩，城秋月正圓。
單于莫近塞，都護欲臨

邊漢驛，通煙火，胡沙泛井泉。
功成須獻捷，未必去經年。

贈梁州張都督

聞君爲漢將，虜騎不南侵。
出塞清沙漠，還家拜羽林。
風霜臣節苦，歲月主恩深。
爲語西河使，知余報國心。

王家少婦

十五嫁王昌，盈盈入畫堂。
自矜年最少，復倚婿爲郎。
舞愛前溪綠，歌憐子夜長。
閒來鬪百草，度日不成粧。

岐王席觀妓

二月春來半王家日正長柳垂金屋暖花發玉樓
香拂匣先臨鏡調笙更炙簧還將歌舞態只擬奉
君王

長門怨

君王寵初歇棄妾長門宮紫殿青苔滿高樓明月
空夜愁生枕席春意罷簾櫳泣盡無人問容華落
鏡中

上巳

巳日帝城春傾都袂辰停車湏傍水奏樂要驚

塵弱柳障行騎浮橋擁看人猶言日尚早更向九
龍津

寄盧象

客從巴南度傳爾泝行舟是日風波霽高唐雨半
收青山滿蜀道綠水向荊州不作書相問誰能慰
別愁

五言排律

舟行入剡

鳴棹下東陽回舟入剡鄉青山行不盡綠水去何
長地氣秋仍濕江風晚漸涼山梅猶作雨溪橘未

知霜謝客文逾盛林公未可忘多慙越中好流恨
閱時芳

奉和許給事夜直簡諸公

西掖黃樞近東曹紫禁連池因才子拜人用省郎
遷夜直千門靜河明萬象懸建章宵漏急閭闔曉
鐘傳寵列貂蟬位恩深侍從年九重初起草五夜
即成篇顧已無官次循涯但自憐遠陪蘭渚作空
此仰神僊

相逢行

妾年初二八家住洛橋頭玉戶臨馳道朱門近御

溝使君何暇問夫壻大長秋女弟新承寵諸兄近
拜侯春生百子殿花發五城樓出入千門裏年年
樂未休

澄水如鑑

聖賢將立喻上善貯情深潔白依全德澄清有片
心澆浮知不撓濫濁固難侵方寸懸高鑑生涯詎
陸沉對泉能自誠如鏡靜相臨廉慎傳家政流芳
合古今

七言律詩

行經華陰

岩崑大華俯咸京天外三峯削不成武帝祠前雲
欲散仙人掌上雨初晴河山北枕秦關險驛樹西
連漢時平借問路傍名利客無如此處學長生

黃鶴樓

昔人已乘白雲去此地空餘黃鶴樓黃鶴一去不
復返白雲千載空悠悠晴川歷歷漢陽樹芳草萋
萋鸚鵡洲日暮鄉關何處是煙波江上使人愁

五言絕句

長干曲四首

君家何處住妾住在橫塘停船暫借問或恐是同

鄉

家臨九江水來去九江側同是長干人生小不相

識

下渚多風浪蓮舟漸覺稀那能不相待獨自送潮

歸

三江潮水急五湖風浪涌由來花性輕莫畏蓮舟

重

七言絕句

維揚送友還蘇州

長安南下幾程途得到邗溝弔綠蕪渚畔鱸魚舟

崔顥集卷下
上鈞羨君歸老向東吳

崔顥集卷下終

崔曙集

山下晚晴

寥寥遠天淨溪路何空濛斜光照踈雨秋氣生白
虹雲盡山色暝蕭條西北風故林歸宿處一葉下
梧桐

潁陽東溪懷古

靈溪氛霧歇皎鏡清心顏空色下映水秋聲多在
山世入久踈曠萬物皆自閒白鷺寒更浴孤雲晴
未還昔時讓王者此地閉柴關無以躡高步淒涼
岑壑間

古意

綠筍總成行紅花亦成子能當此時好獨自幽閉
裏夜夜苦更長愁來不如死

宿大和尚塔贈如上人兼呈常孫二山人
支公已寂滅影塔山上古更有真僧來道場救諸
苦一乘微妙法寓宿清淨土身心能自觀色相了
無取森森松映月漠漠雲近戶嶺外飛雪明夜來
前山雨然燈見棲鴿作禮聞信鼓曉霽南山開秋
華淨天宇願言出世塵謝爾申及甫

送薛據之宋州

無媒嗟失路有道亦乘流客處不堪別異鄉應共
愁我生早孤賤淪落居此州風土至今憶山河皆
昔遊一從文章事兩京春復秋君去問相識幾人
成白頭

早發交崖山還太室

東林氣微白寒鳥高高翔吾亦自茲去北山歸草
堂仲冬正三五日月遙相望蕭蕭過潁上矚矚辯
少陽春冰生積雪野火出枯桑獨往路難盡窮陰
人易傷傷此無衣客如何蒙雨霜

明堂火珠

正位開重屋凌雲出火珠夜來霜月滿曙後一星
孤天淨光難滅雲生望欲無還知聖明代國寶在
名都

途中晚發

曉霽長風裏勞歌起遠期雲輕歸海疾月滿下山
遲旅望因高盡鄉心遇物悲故林遙不見况在落
花時

緱山廟

遺廟宿陰陰孤峯映綠林步隨仙路遠意入道門
深澗水流年月山雲變古今祇聞風竹裏猶有鳳

笙音

同諸公謁啓母祠

闕宮凌紫微芳草閉閒扉帝子復何在王孫遊不
歸春風鳴玉珮暮雨拂靈衣豈但湘江口能令懷
二妃

奉酬中書相公至日圓丘攝事合於後閣
宿齋移止於集賢院叙懷見寄之作

典籍開書府恩榮避鼎司郊丘資有事齋戒守無
為宿霧蒙瓊樹餘香覆玉墀進經逢一夜展禮值
明時勲共山河列名同竹帛垂年年佐堯舜相與

致雍熙

寄友

吾友東南美昔聞登此樓人從川上去書在壁中
留巖子好真隱謝公躄遠遊清風初作興夏日復
銷愁詩與文章古迹隨山水幽已辜蒼生望空見
黃河流榮樂春將晚悲涼物似秋天高不可問掩
泣赴行舟

九日與崔明府登高

漢文皇帝有高臺此日登臨曙色開三晉雲山皆
北向二陵風雨自西來關門令尹誰能識河上仙

翁去不迴且欲近尋彭澤宰陶然共醉菊花杯

對雨送鄭陵

別愁復兼雨別淚還如霰寄心海上雲千里常相
見

嵩山尋馮鍊師不還

青溪訪道凌煙曙王子仙成已飛去更值空山雷
雨時雲林薄暮歸何處

崔曙集終

